




# 金剛般若波羅蜜經塔

在在處處 若有此經 當知此處 卽爲是塔




皆應恭敬 作禮圍繞 以諸華香 而散其處



南無本師釋迦牟尼佛





國基永固 世道遐昌  
佛日增輝 法輪常轉

姚秦三藏法師鳩摩羅什譯

# 金剛般若波羅蜜經

《金剛經塔寫經版》

佛陀教育基金會印贈

## 金剛經啟請

若有人受持金剛經者。

先須至心念淨口業真言。

然後啟請八金剛。四菩薩名號。

所在之處。常當擁護。

爐香讚

爐香乍爇 法界蒙薰 諸佛海會  
悉遙聞 隨處結祥雲 誠意方殷  
諸佛現全身

南無香雲蓋菩薩摩訶薩

三稱

淨身業真言

唵 修哆唎 修哆唎 修摩唎

修摩唎 薩婆訶

淨口業真言

唵 修唎修唎 摩訶修唎 修修

唎 薩婆訶

淨意業真言

唵 嚩日囉怛訶賀斛

淨三業真言

唵 娑嚩 婆嚩 秫馱 娑嚩

達摩 娑嚩 婆嚩 秫度憾

安土地真言

南無三滿多 母馱喃 唵 度嚩

度嚩地尾 娑婆訶

普供養真言

唵 誡誡曩 三婆嚩 伐日囉 斛

奉請八金剛

奉請青除災金剛

奉請辟毒金剛

奉請黃隨求金剛

奉請白淨水金剛

奉請赤聲火金剛

奉請定持災金剛

奉請紫賢金剛

奉請大神金剛

奉請四菩薩

奉請金剛眷菩薩

奉請金剛索菩薩

奉請金剛愛菩薩  
奉請金剛語菩薩

## 發願文

稽首三界尊  
皈命十方佛  
我今發宏願  
持此金剛經  
上報四重恩  
下濟三塗苦  
若有見聞者  
悉發菩提心  
盡此一報身  
同生極樂國

云何梵

云何得長壽

金剛不壞身

復以何因緣

得大堅固力

云何於此經

究竟到彼岸

願佛開微密

廣為眾生說

南無本師釋迦牟尼佛

三稱

開經偈

無上甚深微妙法  
百千萬劫難遭遇  
我今見聞得受持  
願解如來真實義

# 金剛般若波羅蜜經

姚秦三藏法師鳩摩羅什譯

## 法會因由分第一\*

如是我聞。一時。佛在舍衛國  
祇樹給孤獨園。與大比丘眾

\*《大正藏》無「三十二分」之分段及分段題目。

千二百五十人俱。爾時。世尊食時。著衣持鉢。入舍衛大城乞食。於其城中次第乞已。還至本處。飯食訖。收衣鉢。洗足已。敷座而坐。

## 善現啟請分第二

時長老須菩提在大眾中。即從座

起。偏袒右肩。右膝著地。合掌  
恭敬。而白佛言。希有。世尊。  
如來善護念諸菩薩。善付囑諸菩  
薩。世尊。善男子。善女人。發  
阿耨多羅三藐三菩提心。云何應  
住。<sup>\*</sup>云何降伏其心。佛言。善

哉。善哉。須菩提。如汝所說。  
如來善護念諸菩薩。善付囑諸菩  
薩。汝今諦聽。當為汝說。善男  
子。善女人。發阿耨多羅三藐三  
菩提心。應如是住。如是降伏其  
心。唯然。世尊。願樂欲聞。

大乘正宗分第三

佛告須菩提。諸菩薩摩訶薩。應如是降伏其心。所有一切眾生之類。若卵生。若胎生。若濕生。若化生。若有色。若無色。若有想。若無想。若非有想非無想。我皆令入無餘涅槃而滅度之。如是滅度無量無數無邊眾生。實無

眾生得滅度者。何以故。須菩提。若菩薩有我相。人相。眾生相。壽者相。即非菩薩。

#### 妙行無住分第四

復次。須菩提。菩薩於法。應無所住。行於布施。所謂不住色布施。不住聲。香。味。觸。法布

施。須菩提。菩薩應如是布施。  
不住於相。何以故。若菩薩不住  
相布施。其福德不可思量。須菩  
提。於意云何。東方虛空可思量  
不。不也。世尊。須菩提。南西  
北方。四維上下虛空。可思量  
不。不也。世尊。須菩提。菩薩

無住相布施。福德亦復如是。不可思量。須菩提。菩薩但應如所教住。

### 如理實見分第五

須菩提。於意云何。可以身相見如來不。不也。世尊。不可以身相得見如來。何以故。如來所說

身相。即非身相。佛告須菩提。  
凡所有相。皆是虛妄。若見諸相  
非相。即見<sup>\*</sup>如來。

### 正信希有分第六

須菩提白佛言。世尊。頗有眾  
生。得聞如是言說章句。生實信

\*《大正藏》「即」作「則」。

不。佛告須菩提。莫作是說。如  
來滅後。後五百歲。有持戒修福  
者。於此章句。能生信心。以此  
為實。當知是人。不於一佛。  
二佛。三四五佛而種善根。已  
於無量千萬佛所種諸善根。聞是  
章句。乃至一念生淨信者。須菩

提。如來悉知悉見。是諸眾生得如是無量福德。何以故。是諸眾生。無復我相。人相。眾生相。壽者相。無法相。亦無非法相。何以故。是諸眾生若心取相。即<sup>\*</sup>為著我。人。眾生。壽者。

\*《大正藏》「即」作「則」。

若取法相。即著我。人。眾生。  
壽者。何以故。若取非法相。即  
著我。人。眾生。壽者。是故不  
應取法。不應取非法。以是義  
故。如來常說。汝等比丘。知我  
說法。如筏喻者。法尚應捨。何  
況非法。

## 無得無說分第七

須菩提。於意云何。如來得阿耨多羅三藐三菩提耶。如來有所說法耶。須菩提言。如我解佛所說義。無有定法名阿耨多羅三藐三菩提。亦無有定法如來可說。何以故。如來所說法。皆不可取。

不可說。非法。非非法。所以者何。一切賢聖。皆以無為法而有差別。

### 依法出生分第八

須菩提。於意云何。若人滿三千大千世界七寶。以用布施。是人所得福德。寧為多不。須菩提

言。甚多。世尊。何以故。是福德。即非福德性。是故如來說福德多。若復有人。於此經中。受持乃至四句偈等。為他人說。其福勝彼。何以故。須菩提。一切諸佛。及諸佛阿耨多羅三藐三菩提法。皆從此經出。須菩提。所

謂佛法者。即非佛法。

一相無相分第九

須菩提。於意云何。須陀洹能作是念。我得須陀洹果不。須菩提言。不也。世尊。何以故。須陀洹名為入流。而無所入。不入色。聲。香。味。觸。法。是名

須陀洹。須菩提。於意云何。  
斯陀含能作是念。我得斯陀含  
果不。須菩提言。不也。世尊。  
何以故。斯陀含名一往來。而實  
無往來。是名斯陀含。須菩提。  
於意云何。阿那含能作是念。我  
得阿那含果不。須菩提言。不

也。世尊。何以故。阿那含名為  
不來。而實無不來。是故名阿那  
含。須菩提。於意云何。阿羅漢  
能作是念。我得阿羅漢道不。須  
菩提言。不也。世尊。何以故。  
實無有法名阿羅漢。世尊。若阿  
羅漢作是念。我得阿羅漢道。即

為著我。人。眾生。壽者。世尊。佛說我得無諍三昧。人中最為第一。是第一離欲阿羅漢。世尊\*。我不作是念。我是離欲阿羅漢。世尊。我若作是念。我得阿羅漢道。世尊則不說須菩提是

\*《大正藏》無「世尊」二字。

樂阿蘭那行者。以須菩提實無所行。而名須菩提是樂阿蘭那行。

莊嚴淨土分第十

佛告須菩提。於意云何。如來昔在然燈佛所。於法有所得不。不也。<sup>\*</sup>世尊。如來在然燈佛所。

\*《大正藏》無「不也」二字。

於法實無所得。須菩提。於意云何。菩薩莊嚴佛土不。不也。世尊。何以故。莊嚴佛土者。即非莊嚴。是名莊嚴。是故。須菩提。諸菩薩摩訶薩。應如是生清淨心。不應住色生心。不應住聲。香。味。觸。法生心。應無所住。

而生其心。須菩提。譬如有人。  
身如須彌山王。於意云何。是身  
為大不。須菩提言。甚大。世尊。  
何以故。佛說非身。是名大身。

無為福勝分第十一

須菩提。如恆河中所有沙數。如  
是沙等恆河。於意云何。是諸恆

河沙。寧為多不。須菩提言。甚多。世尊。但諸恆河尚多無數。何況其沙。須菩提。我今實言告汝。若有善男子。善女人。以七寶滿爾所恆河沙數三千大千世界。以用布施。得福多不。須菩提言。甚多。世尊。佛告須菩提。

若善男子。善女人。於此經中。  
乃至受持四句偈等。為他人說。  
而此福德。勝前福德。

## 尊重正教分第十二

復次。須菩提。隨說是經。乃至  
四句偈等。當知此處。一切世間  
天。人。阿修羅。皆應供養。如

佛塔廟。何況有人盡能受持讀誦。須菩提。當知是人。成就最上第一希有之法。若是經典所在之處。即<sup>\*</sup>為有佛。若尊重弟子。

### 如法受持分第十三

爾時。須菩提白佛言。世尊。當

\*《大正藏》「即」作「則」。

何名此經。我等云何奉持。佛告  
須菩提。是經名為金剛般若波  
羅蜜。以是名字。汝當奉持。  
所以者何。須菩提。佛說般若  
波羅蜜。即非般若波羅蜜。是名  
般若波羅蜜\*。須菩提。於意云

\*《大正藏》無「是名般若波羅蜜」此句。

何。如來有所說法不。須菩提白  
佛言。世尊。如來無所說。須菩  
提。於意云何。三千大千世界所  
有微塵。是為多不。須菩提言。  
甚多。世尊。須菩提。諸微塵。  
如來說非微塵。是名微塵。如來  
說世界非世界。是名世界。須菩

提。於意云何。可以三十二相見  
如來不。不也。世尊。不可以  
三十二相得見如來。何以故。如  
來說三十二相。即是非相。是名  
三十二相。須菩提。若有善男  
子。善女人。以恆河沙等身命布  
施。若復有人。於此經中。乃至

受持四句偈等。為他人說。其福甚多。

### 離相寂滅分第十四

爾時。須菩提聞說是經。深解義趣。涕淚悲泣。而白佛言。希有。世尊。佛說如是甚深經典。我從昔來所得慧眼。未曾得聞如是之

經。世尊。若復有人得聞是經。  
信心清淨。即<sup>\*</sup>生實相。當知是  
人。成就第一希有功德。世尊。  
是實相者。則是非相。是故如來  
說名實相。世尊。我今得聞如是  
經典。信解受持不足為難。若當

來世後五百歲。其有眾生。得聞  
是經。信解受持。是人則為第  
一希有。何以故。此人無我相。  
無人相。無眾生相。無壽者相。  
所以者何。我相。即是非相。  
人相。眾生相。壽者相。即是非

相。何以故。離一切諸相。則名諸佛。佛告須菩提。如是。如是。若復有人。得聞是經。不驚。不怖。不畏。當知是人。甚為希有。何以故。須菩提。如來說第一波羅蜜。即非第一波羅蜜。是名第一波羅蜜。須菩提。忍辱波羅

蜜。如來說非忍辱波羅蜜。是名  
忍辱波羅蜜\*。何以故。須菩提。  
如我昔為歌利王割截身體。我於  
爾時。無我相。無人相。無眾生  
相。無壽者相。何以故。我於往  
昔節節支解時。若有我相。人

\*《大正藏》無「是名忍辱波羅蜜」此句。

相。眾生相。壽者相。應生瞋恨。  
須菩提。又念過去。於五百世作  
忍辱仙人。於爾所世。無我相。  
無人相。無眾生相。無壽者相。  
是故。須菩提。菩薩應離一切  
相。發阿耨多羅三藐三菩提心。  
不應住色生心。不應住聲。香。

味。觸。法生心。應生無所住心。  
若心有住。即<sup>\*</sup>為非住。是故。  
佛說菩薩心不應住色布施。須菩  
提。菩薩為利益一切眾生故。<sup>\*\*</sup>  
應如是布施。如來說一切諸相。  
即是非相。又說一切眾生。即非

\*《大正藏》「即」作「則」。 \*\*《大正藏》無「故」字。

眾生。須菩提。如來是真語者。  
實語者。如語者。不誑語者。不  
異語者。須菩提。如來所得法。  
此法無實無虛。須菩提。若菩薩  
心住於法而行布施。如人入闇。  
則無所見。若菩薩心不住法而行  
布施。如人有目。日光明照。見

種種色。須菩提。當來之世。若有善男子。善女人。能於此經受持。讀誦。即<sup>\*</sup>為如來以佛智慧。悉知是人。悉見是人。皆得成就無量無邊功德。

## 持經功德分第十五

須菩提。若有善男子。善女人。  
初日分以恆河沙等身布施。中日  
分復以恆河沙等身布施。後日分  
亦以恆河沙等身布施。如是無量  
百千萬億劫。以身布施。若復有  
人。聞此經典。信心不逆。其福  
勝彼。何況書寫。受持。讀誦。

為人解說。須菩提。以要言之。  
是經有不可思議。不可稱量。無  
邊功德。如來為發大乘者說。為  
發最上乘者說。若有人能受持。  
讀誦。廣為人說。如來悉知是  
人。悉見是人。皆得成就不可  
量。不可稱。無有邊。不可思議

功德。如是人等。即為荷擔如來  
阿耨多羅三藐三菩提。何以故。  
須菩提。若樂小法者。著我見。  
人見。眾生見。壽者見。則於此  
經不能聽受。讀誦。為人解說。  
須菩提。在在處處。若有此經。  
一切世間。天。人。阿修羅所應

供養。當知此處。即<sup>\*</sup>為是塔。皆應恭敬。作禮圍繞。以諸華香而散其處。

### 能淨業障分第十六

復次。須菩提。善男子。善女人。受持。讀誦此經。若為人

\*《大正藏》「即」作「則」。

輕賤。是人先世罪業。應墮惡道。以今世人輕賤故。先世罪業。即<sup>\*</sup>為消滅。當得阿耨多羅三藐三菩提。須菩提。我念過去無量阿僧祇劫。於然燈佛前。得值八百四千萬億那由他諸佛。悉

\*《大正藏》「即」作「則」。

皆供養承事。無空過者。若復有  
人。於後末世。能受持。讀誦此  
經。所得功德。於我所供養諸佛  
功德。百分不及一。千萬億分。  
乃至算數譬喻所不能及。須菩  
提。若善男子。善女人。於後末  
世。有受持。讀誦此經。所得功

德。我若具說者。或有人聞。心  
即<sup>\*</sup>狂亂。狐疑不信。須菩提。  
當知是經義不可思議。果報亦不  
可思議。

究竟無我分第十七

爾時。須菩提白佛言。世尊。善

\*《大正藏》「即」作「則」。

男子。善女人。發阿耨多羅三藐  
三菩提心。云何應住。云何降伏  
其心。佛告須菩提。善男子。善  
女人。發阿耨多羅三藐三菩提心  
者。當生如是心。我應滅度一切  
眾生。滅度一切眾生已。而無有  
一眾生實滅度者。何以故。須菩

提。若菩薩有我相。人相。眾生相。壽者相。即<sup>\*</sup>非菩薩。所以者何。須菩提。實無有法發阿耨多羅三藐三菩提心者。須菩提。於意云何。如來於然燈佛所。有法得阿耨多羅三藐三菩提不。不

\*《大正藏》「即」作「則」。

也。世尊。如我解佛所說義。佛  
於然燈佛所。無有法得阿耨多羅  
三藐三菩提。佛言。如是。如  
是。須菩提。實無有法如來得阿  
耨多羅三藐三菩提。須菩提。若  
有法如來得阿耨多羅三藐三菩提

者。然燈佛即<sup>\*</sup>不與我授記。汝  
於來世當得作佛。號釋迦牟尼。  
以實無有法得阿耨多羅三藐三菩  
提。是故然燈佛與我授記。作  
是言。汝於來世。當得作佛。號  
釋迦牟尼。何以故。如來者。即

\*《大正藏》「即」作「則」。

諸法如義。若有人言。如來得阿耨多羅三藐三菩提。須菩提。實無有法。佛得阿耨多羅三藐三菩提。須菩提。如來所得阿耨多羅三藐三菩提。於是中無實無虛。是故如來說。一切法皆是佛法。須菩提。所言一切法者。即非一

切法。是故名一切法。須菩提。  
譬如人身長大。須菩提言。世  
尊。如來說人身長大。則為非大  
身。是名大身。須菩提。菩薩亦  
如是。若作是言。我當滅度無量  
眾生。則不名菩薩。何以故。須  
菩提。實無有法名為菩薩。是故

佛說。一切法無我。無人。無眾  
生。無壽者。須菩提。若菩薩作  
是言。我當莊嚴佛土。是不名菩  
薩。何以故。如來說莊嚴佛土  
者。即非莊嚴。是名莊嚴。須菩  
提。若菩薩通達無我法者。如來  
說名真是菩薩。

一體同觀分第十八

須菩提。於意云何。如來有肉眼  
不。如是。世尊。如來有肉眼。  
須菩提。於意云何。如來有天眼  
不。如是。世尊。如來有天眼。  
須菩提。於意云何。如來有慧眼  
不。如是。世尊。如來有慧眼。

須菩提。於意云何。如來有法眼  
不。如是。世尊。如來有法眼。  
須菩提。於意云何。如來有佛眼  
不。如是。世尊。如來有佛眼。  
須菩提。於意云何。如<sup>\*</sup>恆河中  
所有沙。佛說是沙不。如是。世

尊。如來說是沙。須菩提。於意云何。如一恆河中所有沙。有如是沙等恆河。是諸恆河所有沙數。佛世界如是。寧為多不。甚多。世尊。佛告須菩提。爾所國土中。所有眾生若干種心。如來悉知。何以故。如來說諸心。皆為

非心。是名為心。所以者何。須菩提。過去心不可得。現在心不可得。未來心不可得。

法界通化分第十九

須菩提。於意云何。若有人滿三千大千世界七寶。以用布施。是人以是因緣。得福多不。如

是。世尊。此人以是因緣。得福甚多。須菩提。若福德有實。如來不說得福德多。以福德無故。如來說得福德多。

### 離色離相分第二十

須菩提。於意云何。佛可以具足色身見不。不也。世尊。如來不

應以具足色身見。何以故。如來說具足色身。即非具足色身。是名具足色身。須菩提。於意云何。如來可以具足諸相見不。不也。世尊。如來不應以具足諸相見。何以故。如來說諸相具足。即非具足。是名諸相具足。

非說所說分第二十一

須菩提。汝勿謂如來作是念。我當有所說法。莫作是念。何以故。若人言如來有所說法。即為謗佛。不能解我所說故。須菩提。說法者。無法可說。是名說法。爾時。慧命須菩提白佛言。

世尊。頗有眾生。於未來世。聞說是法。生信心不。佛言。須菩提。彼非眾生。非不眾生。何以故。須菩提。眾生。眾生者。如來說非眾生。是名眾生。

無法可得分第二十二

須菩提白佛言。世尊。佛得阿耨

多羅三藐三菩提。為無所得耶。  
佛言。如是。如是。須菩提。我  
於阿耨多羅三藐三菩提。乃至無  
有少法可得。是名阿耨多羅三藐  
三菩提。

淨心行善分第二十三

復次。須菩提。是法平等。無有

高下。是名阿耨多羅三藐三菩提。以無我。無人。無眾生。無壽者。修一切善法。即得阿耨多羅三藐三菩提。須菩提。所言善法者。如來說即非善法。是名善法。

\*《大正藏》「即」作「則」。

## 福智無比分第二十四

須菩提。若三千大千世界中。所有諸須彌山王。如是等七寶聚。有人持用布施。若人以此般若波羅蜜經。乃至四句偈等。受持。讀誦。為他人說。於前福德。百分不及一。百千萬億分。乃至算

數譬喻所不能及。

化無所化分第二十五

須菩提。於意云何。汝等勿謂如來作是念。我當度眾生。須菩提。莫作是念。何以故。實無有眾生如來度者。若有眾生如來度

者。如來即<sup>\*</sup>有我。人。眾生。  
壽者。須菩提。如來說有我者。  
即<sup>\*</sup>非有我。而凡夫之人。以為有  
我。須菩提。凡夫者。如來說即<sup>\*</sup>  
非凡夫。是名凡夫。

## 法身非相分第二十六

須菩提。於意云何。可以三十二相觀如來不。須菩提言。如是。如是。以三十二相觀如來。佛言。須菩提。若以三十二相觀如來者。轉輪聖王即<sup>\*</sup>是如來。須菩提白佛言。世尊。如我解佛所

\*《大正藏》「即」作「則」。

說義。不應以三十二相觀如來。  
爾時。世尊而說偈言。

若以色見我。以音聲求我。  
是人行邪道。不能見如來。

### 無斷無滅分第二十七

須菩提。汝若作是念。如來不以  
具足相故。得阿耨多羅三藐三菩

提。須菩提。莫作是念。如來不以具足相故。得阿耨多羅三藐三菩提。須菩提。汝若作是念。發阿耨多羅三藐三菩提心者。說諸法斷滅。莫作是念。何以故。發阿耨多羅三藐三菩提心者。於法不說斷滅相。

不受不貪分第二十八

須菩提。若菩薩以滿恆河沙等世界七寶。持用布施。若復有人。知一切法無我。得成於忍。此菩薩勝前菩薩所得功德。何以故。須菩提。以諸菩薩不受福德故。須菩提白佛言。世尊。云何菩

薩。不受福德。須菩提。菩薩所作福德。不應貪著。是故說。不受福德。

### 威儀寂靜分第二十九

須菩提。若有人言。如來若來。若去。若坐。若臥。是人不解我所說義。何以故。如來者。無所

從來。亦無所去。故名如來。

一合理相分第三十

須菩提。若善男子。善女人。以三千大千世界碎為微塵。於意云何。是微塵眾。寧為多不。須菩提言。<sup>\*</sup>甚多。世尊。何以故。

\*《大正藏》無「須菩提言」四字。

若是微塵眾實有者。佛即不說  
是微塵眾。所以者何。佛說微塵  
眾。即非微塵眾。是名微塵眾。  
世尊。如來所說三千大千世界。  
即非世界。是名世界。何以故。  
若世界實有者。即是一合相。如

來說一合相。即<sup>\*</sup>非一合相。是  
名一合相。須菩提。一合相者。  
即<sup>\*</sup>是不可說。但凡夫之人。貪著  
其事。

知見不生分第三十一

須菩提。若人言。佛說我見。人

\*《大正藏》「即」作「則」。

見。眾生見。壽者見。須菩提。  
於意云何。是人解我所說義不。  
不也。世尊。是人不解如來所說  
義。何以故。世尊說我見。人見。  
眾生見。壽者見。即非我見。人  
見。眾生見。壽者見。是名我見。  
人見。眾生見。壽者見。須菩提。

發阿耨多羅三藐三菩提心者。於一切法。應如是知。如是見。如是信解。不生法相。須菩提。所言法相者。如來說即非法相。是名法相。

應化非真分第三十二

須菩提。若有人以滿無量阿僧祇

世界七寶。持用布施。若有善男子。善女人。發菩提心者。持於此經。乃至四句偈等。受持。讀誦。為人演說。其福勝彼。云何為人演說。不取於相。如如不動。何以故。

一切有為法。如夢幻泡影。

如露亦如電。應作如是觀。  
佛說是經已。長老須菩提。及諸  
比丘。比丘尼。優婆塞。優婆夷。  
一切世間天。人。阿修羅。聞佛  
所說。皆大歡喜。信受奉行。

## 金剛般若波羅蜜經

般若無盡藏真言

納謨薄伽伐帝 鉢唎若 波羅蜜

多曳 怛姪他 唵 訖唎 地唎

室唎 戌嚕知 三密栗知 佛社

曳 莎訶

金剛心真言

唵 烏倫尼 娑婆訶

補闕真言

南謨喝囉怛那 哆囉夜耶 佉囉  
佉囉 俱住俱住 摩囉摩囉 虎  
囉吽 賀賀 蘇怛拏吽 潑抹拏  
娑婆訶

補闕圓滿真言

唵 呼嚧呼嚧 社曳穆契 莎訶

普回向真言

唵 娑摩囉 娑摩囉 彌摩曩  
薩哈囉 摩訶咱哈囉 吽

金剛讚

斷疑生信 絕相超宗 頓忘人法  
解真空 般若味重重 四句融通  
福德歎無窮

南無金剛會上佛菩薩

三稱

# 般若波羅蜜多心經

觀自在菩薩。行深般若波羅蜜  
多時。照見五蘊皆空。度一切  
苦厄。舍利子。色不異空。空  
不異色。色即是空。空即是色。  
受想行識。亦復如是。舍利子。  
是諸法空相。不生不滅。不垢不

淨。不增不減。是故空中無色。  
無受想行識。無眼耳鼻舌身意。  
無色聲香味觸法。無眼界。乃至  
無意識界。無無明。亦無無明  
盡。乃至無老死。亦無老死盡。  
無苦集滅道。無智亦無得。以無  
所得故。菩提薩埵。依般若波羅

蜜多故。心無罣礙。無罣礙故。  
無有恐怖。遠離顛倒夢想。究竟  
涅槃。三世諸佛。依般若波羅蜜  
多故。得阿耨多羅三藐三菩提。  
故知般若波羅蜜多。是大神咒。  
是大明咒。是無上咒。是無等等  
咒。能除一切苦。真實不虛。故

說般若波羅蜜多咒。即說咒曰。  
揭諦。揭諦。波羅揭諦。波羅僧  
揭諦。菩提薩婆訶。

# 大悲咒

南無喝囉怛那哆囉夜耶。南無阿  
唎耶。婆盧羯帝爍鉢囉耶。菩提  
薩埵婆耶。摩訶薩埵婆耶。摩  
訶迦盧尼迦耶。唵。薩皤囉罰  
曳。數怛那怛寫。南無悉吉唵埵  
伊蒙阿唎耶。婆盧吉帝室佛囉楞

馱婆。南無那囉謹墀。醯唎摩  
訶皤哆沙咩。薩婆阿他豆輸朋。  
阿逝孕。薩婆薩哆那摩婆薩哆。  
那摩婆伽。摩罰特豆。怛姪他。  
唵。阿婆盧醯。盧迦帝。迦羅  
帝。夷醯唎。摩訶菩提薩埵。薩  
婆薩婆。摩囉摩囉。摩醯摩醯唎

馱孕。俱盧俱盧羯蒙。度盧度盧  
罰闍耶帝。摩訶罰闍耶帝。陀囉  
陀囉。地唎尼。室佛囉耶。遮囉  
遮囉。麼麼罰摩囉。穆帝隸。伊  
醯伊醯。室那室那。阿囉唵佛囉  
舍利。罰沙罰唵。佛囉舍耶。呼  
盧呼盧摩囉。呼盧呼盧醯利。娑

囉娑囉。悉唎悉唎。蘇嚕蘇嚕。  
菩提夜菩提夜。菩馱夜菩馱夜。  
彌帝唎夜。那囉謹墀。地利瑟尼  
那。婆夜摩那。娑婆訶。悉陀夜。  
娑婆訶。摩訶悉陀夜。娑婆訶。  
悉陀喻藝。室皤囉耶。娑婆訶。  
那囉謹墀。娑婆訶。摩囉那囉。

娑婆訶。悉囉僧阿穆佉耶。娑婆  
訶。娑婆摩訶阿悉陀夜。娑婆  
訶。者吉囉阿悉陀夜。娑婆訶。  
波陀摩羯悉陀夜。娑婆訶。那囉  
謹墀皤伽囉耶。娑婆訶。摩婆利  
勝羯囉夜。娑婆訶。南無喝囉怛  
那哆囉夜耶。南無阿利耶。婆羅

吉帝。爍皤囉耶。娑婆訶。唵。  
悉殿都。漫多囉。跋陀耶。娑婆  
訶。

三皈依

自皈依佛

當願眾生

體解大道

發無上心

自皈依法

當願眾生

深入經藏

智慧如海

自皈依僧

當願眾生

統理大眾

一切無礙

和南聖眾

回向偈

願以此功德  
普及於一切  
我等與眾生  
皆共成佛道

寫經功德殊勝行  
無邊勝福皆回向  
普願沉溺諸眾生  
速往無量光佛剎  
十方三世一切佛  
一切菩薩摩訶薩  
摩訶般若波羅蜜

願以此功德  
平等施一切  
同發菩提心  
往生安樂國

# 《金剛般若波羅蜜經》內容簡述

比丘  
祥雲

## 一、簡述：

《金剛般若波羅蜜經》的簡稱，叫《金剛經》。這一卷《金剛經》和我們中國人最有緣分。很久以來，它就是家喻戶曉、婦孺皆知的經典了。

《金剛經》的主要翻譯，共有六種。在教內最為通用的，是姚秦時代的鳩摩羅什大師

所翻譯的經本。

《金剛經》屬於「般若部」的經典，「般若部」的經典共分為十類，有七百五十一卷。在這十類「般若」之中，《大般若經》擁有六百卷，《金剛經》是《大般若經》的第五百七十七卷——佛說《金剛經》的時間，大約在我國的周穆王九年。說經的地點，是在印度當時的舍衛國祇樹給孤獨園。

註解《金剛經》的書籍，時至今日，大概

至少有一千種了。

根據民國江味農居士所寫的《金剛經講義》的考正，《金剛經》共計有五千八百三十七個字。它的篇幅雖然不大，但是它的內容所含蓋的道理，卻足以代表全部「般若部」經典的思想要領。因此，有人說：「般若部經典」是全部佛法的靈魂，而《金剛經》則是全部「般若部經典」的靈魂。

在《金剛經》的經文裡，有「三十二分」

的分段，這種分段法，傳說是南北朝時代梁武帝的兒子——昭明太子所劃分的段落，但是經過現代學者的考正結果，並不能認定這種說法是正確的。因此，我們可以知道那「三十二分」的「題目」並不是《金剛經》的原文字句；所以誦經的人就不該把那三十二句讀進去了。

《金剛經》的經文體裁：是「對話式」的章法，用「正反合」的句調。——這一卷的

經文，全部是釋迦牟尼佛和弟子須菩提之間的對問對答。從他們的問答中，揭開了「發菩提心、安住真心、降伏妄心」的道理。

關於《金剛經》的內容義理，古今的經學家們，通常都說它是以「實相」為「體」，以「無住生心」為「宗」，以「斷疑」為「用」。也有人說：《金剛經》是「以『若見諸相非相，則見如來』為『體』，以『約實相之慧，行無相之檀』為『宗』，以『捨執除疑』為

『用』。還有人說：《金剛經》是「以『無住』為『體』，以『無相』為『宗』，以『妙有』為『用』」。

淺顯地說《金剛經》是指導我們要做到：「三心不住，四相皆空」——破除「我執、法執」而又不著「空執」的境界。同時還要我們能夠運作「應無所住而生其心」的妙用，去廣修「六度萬行」。

《金剛經》是一部「禪經」。「禪」是「千

經所指，萬論歸宗」的法門。修道的人，若不透過「禪定」的功夫，就很難與「道」相應。禪宗五祖弘忍大師曾經說過：「自性若迷，福何可救？不識本心，學法無益」！從這幾句話裡，我們就可以了解，對一個佛教徒來說《金剛經》是何等重要了。——因此，我們奉勸各位大德都能夠讀誦《金剛經》，研究《金剛經》，弘揚《金剛經》。透過「文字般若」運用「觀照般若」，去體證「實相般若」。我們相信，只要能夠勇猛精進，久

而久之，就必然會有「豁然貫通、明心悟道」的機會。

再者：受持金剛經除了能以啟發吾人的靈悟之外，並且能令行者獲致「消災滅罪、辟邪除障、增長福壽」的功德利益。此等靈驗，古今以來時有見聞。——但願幸遇此經的人們，及早信受奉行、禮誦流佈，實所祝盼之至！

（原載民國八十年十月十五日第三十卷第十期獅子吼月刊）

南無護法韋馱尊天菩薩

